

• Landbruks- og matminister Jon Georg Dale (Frp) møtte optimistiske geitebønder med tru på framtidene

# Avviser overproduksjon av geitemjølk

Landbruksministeren meiner det blir produsert for mykje geitemjølk og vil betale geitebønder for å slutte. Geitebønder på Sunnmøre avviser at det er overproduksjon.

– Vi kan ikkje ha overproduksjon av geitemjølk over tid. Viss balansen tek seg opp, vil mine framlegg i landbruksmeldinga vere overflødige. Og ingen ting vil glede meg meir, sa landbruks- og matminister Jon Georg Dale og fekk applaus då han besøkte heimkommunen onsdag.

Geitebonden Hogne Homberset i Hjartåbygda var vertskap og formidla framtidstru for både ost og kjøt av geit.

**Mykje arbeid**  
Homberset har rundt 250 mjølkegeiter på garden.

– Det er altfor mykje arbeid slik vi driv, men vi har fleire arbeidsplassar her. Både dottera mi og foreldra mine jobbar her. Vi har ikkje tid til så mykje anna, men det er kjekt arbeid og vi håpar vi får styre med dette i framtida også, sa Homberset til ministeren.

Då handlar det mykje om økonomi. I landbruksmeldinga Dale har lagt fram er det mykje fokus på overproduksjon og korleis ein kan få ned denne.

– Når nær 20 prosent av geitemjølka ikkje blir brukt til menneskemat, då må vi prøve å få ein balanse som sikrar økonomien i næringa, sa Dale.

Men Homberset sa at det no er i ferd med å bli balanse i geitemjølkproduksjonen.

## FAKTA

- I følgje regjeringa si landbruksmelding er det 287 aktive produsenter av geitemjølk her i landet.

- Regjeringa meiner ein for stor del av geitemjølka i dag blir brukt til fôr, og at overproduksjon gjør det nødvendig å redusere geitemjølkkvoten. Dei meiner marknaden i større grad må ta ansvar for å handtere overproduksjon.

- For å få ned produksjonen foreslår regjeringa ei geografisk og tidsavgrensa oppkjøpsordning for geitemjølkkvotar. Dei ønskjer å samle sterke produksjonsmiljø rundt meieri som føredrar geitemjølk. Tine sitt meieri i Ørsta er eit slikt anlegg.



**MINISTERBESØK:** Hogne Homberset (t.h.) er ein av dei som har satsa stort på geitemjølkproduksjon siste åra. Landbruks- og matminister Jon Georg Dale trur og håpar at det skal gå an å halde oppe denne mjølkeproduksjonen i år framover. Han held også fram geitene som viktige for kulturlandskapspiele. I midten på bildet er Odd A. Folkestad som er lokalpolitikar i Volda.

Under besøket serverte Homberset ein geitost som knapt er råd å få tak i i butikkane.

– Osten er laga på meieriet i Ørsta og er den beste av dei kvite geitostane. Det er for gale at lokale butikkar ikkje tek den inn. Då blir salet deretter, sa Homberset som har pressa ein lokal butikk til å ta innosten.

Geitnæringa har siste åra vore gjennom stor omlegging for å betre mjølkekvaliteten.

– Det har vore eit enormt arbeid, men vi har lykka, og det var verd det, sa Homberset.



**KONTAKT:** Landbruksminister Jon Georg Dale er godt van med sau og hundar, men fekk også god kontakt med geiter i Hjartåbygda.

Meieriet i Ørsta vart berga som følgje av at det er mange geitebruk i området.

– Geita er viktig i distriktet og berga meieriet i Ørsta i fjor. Du må ta med vidare kva dette betyr av ringverknader og arbeidsplassar, sa Homberset og Dale repliserte at hans forslag vil sikre meieriet i Ørsta.

Men Homberset understrekar at dei er lojale overfor geitebønder andre stader og vil ha med alle i framtida.

**Frykta Frp-politikk**  
Sunnmørsposten intervjuja Homberset då Frp kom til mak-

ta, og han frykta då det verste for landbrukspolitikken.

– Så lenge KrF og Venstre opptrer som gode bremseklossar, så har ikkje situasjonen blitt som frykta, seier han i dag.

Dette har Dale hørt før, og han understrekar at dei fører ein politikk basert på samarbeidsavtalen. Men han meiner absolutt det er god Frp-politikk.

– Vi har fått høgare matproduksjon og sjølvforsyninga aukar, og då er eg fornøgd, seier Dale.

**FRAMTIDSTRU:** Claus Oskar Teigen (25) og Thomas Røy (28) er i ferd med å ta over geitebruk i Strandadalen. Dei har tru på framtida for næringa. Det har også naboen Eva Fjørstad.

